

渤海國志長編

冊一

渤海國志
長編

謹庵屬題

黃侃



遼陽金氏千
華山館叢著

渤海國志長編敘例

渤海立國始自唐武后訖於後唐明宗享祚二百二十九年幾與李唐相終始稱爲海東盛國洵不誣矣新唐書藝文志著錄張建章渤海國記三卷特以久佚無由窺見舊唐書北狄傳敘渤海事略具始末而新書載王諡年號輿地職官食貨多爲舊書所無蓋采自張氏之書此外則冊府元龜暨扶桑古籍記朝聘事差詳他書所載亦無慮若干事遼代遼東郡縣多襲渤海舊名具載遼史雖泰半移置而名稱係屬則大致可考依此諸書尋端竟緒加之條理亦一楚楚可觀之作矣不佞曩考遼東輿地間及渤海因思肅愼遺族之立國規模啟於舍利盛於完顏極於愛新金清二史既有成書而渤海一國之史尙付闕如竊以病諸嗣聞率賓唐元素司馬著有渤海國志四卷深喜其

先得我心亟購而讀之覺其取材未富立證尙疏非吾意中之
渤海國志也前歲鍾君慈盦爲不佞言黃申甫太守亦撰有是
書屬其借鈔久久不得歲月荏苒幸值身閒發篋陳書正在今
日乃取嚮所涉覽者比而次之得二十卷書仍唐氏舊名而繫
以長編二字則斬春黃師季剛之所命也正志略分四目曰紀
曰表曰傳曰考體亦略同唐著改志爲考避大名也志前冠以
總略明所自也志後附以文徵叢考餘錄恣詳說也不佞此著
壹遵史體書法稱謂略具剪裁幸較舊志稍爲恢廓非後人之
果愈前人也渤海故疆半所親歷聞見較確一也新著日富考
辨彌精取材自易二也然知人則易自知實難安知不佞自謂
爲恢廓者非他人目爲疏略者乎謹就所知具錄於簡旣竭吾
才未敢自信若夫整齊條理犁然有當以成一國之史正有待

於方聞此亦命名長編之微旨也撰集之例彙括如左

渤海遺事散見羣籍有國之日則詳於諸臣朝聘之事國亡之後則詳於遺民遷徙之迹其他則所紀至略本編就可知者依次撰集稍得總理其所不知壹從蓋闕

本編用別史之例故立紀表傳考四體共得十有五卷是爲正志別撰前志二卷後志三卷物具規模未爲完作

正志之紀表傳三者略加整齊使就條理而不注其所出用史例也惟諸考不然既具正文復加案語渤海典章十佚八九本編就可知者述之始終條理端資詳說命名曰考亦此意耳

本編以總略冠於志前文徵叢考餘錄繫於志後此所以爲長編也總略文徵皆正志所從出叢考以明異同餘錄以槩闕佚亦本編所應具既名長編不厭求詳不足於此而再加整齊之

竊病未能敬俟後賢

本編以敘次渤海民族興廢遞嬗之迹爲主故於末王降遼之後繼以東丹於宗臣諸臣士庶屬部列傳之外兼記遺裔大氏享國二百二十有九年而本編所敘乃至四百餘年甄明始末備於一編題曰渤海國志實渤海民族志也

唐氏舊志壹依史文逐錄直同鈔撮又用唐梁紀年殊乖史體本編以渤海諸王紀年渤海亡後則用東丹征伐貢聘俱有內外之分如此分疏史例乃正

記爲傳考之綱故宜年經月緯祇記大事以簡爲貴若傳若考則不厭其詳若表則以便尋檢補闕遺也本編於渤海大事分年纂集有月日可考者並繫以某月干支其不能確定爲某年者則別爲說以明之

古人左圖右史圖與史並重久矣考地理者非圖莫明近人撰
渤海疆域圖將明崖略亦時多抵牾茲經悉心考訂繪成數圖
以增本編之後

本編徵引羣籍取材至繁亦多爲唐氏所未見別輯徵引書錄
附於編末

不佞於近六七年內蒐討渤海遺文佚事用力頗勤所得僅此
至於古蹟金石則所獲尤尠發地下之藏證往代之史今尙未
臻其極亦以俟諸異日

不佞撰集之旨具此十例殺青可寫仍爲初編異日續有所得
再爲補輯夫作史貴具三長病出衆手具三長則義法以明出
衆手則抵牾不免不佞之撰此書諸師友或假以故書或助以
逐譯或佐以鈔取或參以編校每有采獲皆資羣力然考覽之

勞撰集之役則概由不佞自任書雖未出衆手才則謝乏三長
方彼洪鐘叩以寸莛宏博君子幸裁正之

重光協洽之歲嘉平之月金毓黻識

渤海國志長編總目

卷一 總略上

卷二 總略下

卷三 世紀

卷四 後紀

卷五 年表

卷六 世系表

卷七 大事表

卷八 屬部表

卷九 宗臣列傳

卷十 諸臣列傳

卷十一 士庶列傳

卷十二 屬部列傳

卷十三 遺裔列傳

卷十四 地理考

卷十五 職官考

卷十六 族俗考

卷十七 食貨考

卷十八 文徵

卷十九 叢考

卷二十 餘錄

渤海國志長編卷一

遼陽金毓黻 撰集

總略上

渤海國志前編一

渤海靺鞨大祚榮者本高麗別種也高麗既滅祚榮率家屬徙居營州萬歲通天年契丹李盡忠反叛祚榮與靺鞨乞四比羽各領亡命東奔保阻以自固盡忠既死則天命右玉鈐衛大將軍李楷固率兵討其餘黨先破斬乞四比羽又度天門嶺以迫祚榮祚榮合高麗靺鞨之衆以拒楷固王師大敗楷固脫身而還屬契丹及奚盡降突厥道路阻絕則天不能討祚榮遂率其衆東保桂婁之故地據東牟山築城以居之祚榮驍勇善用兵靺鞨之衆及高麗餘燼稍稍歸之聖祿中自立爲振國王遣使通於突厥其地在營州之東二千里南與新羅相接越憲靺鞨

東北至黑水靺鞨地方二千里編戶十餘萬勝兵數萬人風俗
與高麗及契丹同頗有文字及書記中宗即位遣侍御史張行
岌往招慰之祚榮遣子入侍將加冊立會契丹與突厥連歲寇
邊使命不達睿宗先天二年遣郎將崔訢往冊拜祚榮爲左驍
衛員外大將軍渤海郡王仍以其所統爲忽汗州加授忽汗州
都督自是每歲遣使朝貢開元七年祚榮死玄宗遣使弔祭乃
冊立其嫡子桂婁郡王大武藝襲父爲左驍衛大將軍渤海郡
王忽汗州都督十四年黑水靺鞨遣使來朝詔以其地爲黑水
州仍置長史遣使鎮押武藝謂其屬曰黑水塗經我境始與唐
家相通舊請突厥吐屯皆先告我同去今不計會即請漢官必
是與唐家通謀腹背攻我也遣母弟大門藝及其舅任雅相發
兵以擊黑水門藝曾充質子至京師開元初還國至是謂武藝

曰黑水請唐家官吏即欲擊之是背唐也唐國人衆兵強萬倍於我一朝結怨但自取滅亡昔高麗全盛之時強兵三十餘萬抗敵唐家不事賓伏唐兵一臨掃地俱盡今日渤海之衆數倍少於高麗乃欲違背唐家事必不可武藝不從門藝兵至境又上書固諫武藝怒遣從兄大壹夏代門藝統兵徵門藝欲殺之門藝遂棄其衆間道來奔詔授左驍衛將軍武藝尋遣使朝貢仍上表極言門藝暈狀請殺之上密遣門藝往安西仍報武藝云門藝遠來歸投義不可殺今流向嶺南已遣去訖乃留其使馬文軌蔭勿雅別遣使報之俄有洩其事者武藝又上書云大國示人以信豈有欺誑之理今聞門藝不向嶺南伏請依前殺卻由是鴻臚少卿李道邃源復以不能督察官屬致有漏洩左遷道邃爲曹州刺史復爲澤州刺史遣門藝暫向嶺南以報之

二十年武藝遣其將張文休率海賊攻登州刺史韋俊詔遣門
藝往幽州徵兵以討之仍令太僕員外卿金思蘭往新羅發兵
以攻其南境屬山阻寒凍雪深丈餘兵士死者過半竟無功而
還武藝懷怨不已密遣使至東都假刺客刺門藝於天津橋南
門藝格之不死詔河南府捕獲其賊盡殺之二十五年武藝病
卒其子欽茂嗣立詔遣內侍段守簡往冊欽茂爲渤海郡王仍
嗣其父爲左驍衛大將軍忽汗州都督欽茂承詔赦其境內遣
使隨守簡入朝貢獻大厯二年至十年或頻遣使來朝或間歲
而至或歲內二三至者十二年正月遣使獻日本國舞女一十
一人及方物四月十二月使復來建中三年五月貞元七年正
月皆遣使來朝授其使大常靖爲衛尉卿同正令還蕃八月其
王子大貞翰來朝請備宿衛十年正月以來朝王子大清允爲

右衛將軍同正其下三十餘人拜官有差十一年二月遣內常侍殷志瞻冊大嵩璘爲渤海郡王十四年加銀青光祿大夫檢校司空進封渤海國王嵩璘父欽茂開元中襲父位爲郡王左金吾大將軍天寶中累加特進太子詹事賓客寶應元年進封國王大厯中累加拜司空太尉及嵩璘襲位但授其郡王將軍而已嵩璘遣使叙理故再加冊命十一月以王姪大能信爲左驍衛中郎將虞侯婁蕃長都督茹富仇爲右武衛將軍放還二十一年遣使來朝順宗加嵩璘金紫光祿大夫檢校司空元和元年十月加檢校太尉十二月遣使朝貢四年以嵩璘男元瑜爲銀青光祿大夫檢校秘書監忽汗州都督依前渤海國王五年遣使朝貢者二七年亦遣使來朝八年正月授元瑜弟權知國務言義銀青光祿大夫檢校秘書監都督渤海國王遣內使

李重旻使焉十三年遣使來朝且告哀五月以知國務大仁秀爲銀青光祿大夫檢校秘書監都督渤海國王十五年閏正月遣使來朝加大仁秀金紫光祿大夫檢校司空十二月復遣使來朝貢長慶二年正月又遣使來四年二月大叡等五人來朝請備宿衛寶厯中比歲修貢太和元年四年皆遣使來朝五年大仁秀卒以權知國務大彝震爲銀青光祿大夫檢校秘書監都督渤海國王六年遣王子大明俊等來朝七年正月遣同中書右平章事高寶英來謝冊命仍遣學生三人隨寶英請赴上都學問先遣學生三人事業稍成請歸本國許之二月王子大先晟等六人來朝開成後亦修職貢不絕

舊唐書
渤海傳

玄宗開元七年三月丁酉渤海靺鞨郡王大祚榮死其子武藝嗣位十四年十一月辛丑渤海靺鞨遣其子義信來朝并獻方